

Акафист святой великомученице Параскеве

Празднование 28 октября (10 ноября)

Кондак 1

Избранной Богом от рода благородного, иконийского града, премудрой и всехвальной невесте Христове, яко избавляемии тобою от искушений и бед, благодарственная пения и хваления восписуем ти молитвенницы твои, святая и многострадальная мученице Параскево. Ты же, имущи дерзновение ко Господу, от всяких нас бед свободи, да со умилением и радостью зовем ти:

Радуйся, Параскево, невесто Христова всехвальная.

Икос 1

Ангелом честную и вселюбезную чистоту твоего сердца, многострадальная Параскево, непорочно сохрани, Ангелом собеседница быти сподобилася еси. С нимиже воспевающи Трисвятую песнь Богу на Небеси, услыши и нас, верою и любовью чтущих тя и вопиющих ти хваления сия на земли:

Радуйся, отроковице, Богом Отцем предуставленная быти сообразной в страдании образу Сына Его; радуйся, и Сыном Божиим укрепленная на подвиги страдальческие. Радуйся, истинную веру в Животворящую и Единосущную Троицу свято соблюдшая; радуйся, святое целомудрие и девственную непорочность добре сохраняя. Радуйся, яко радостно уневестилася еси безсмертному Небесному Жениху, Христу; радуйся, земного обручника паче Небесного знати не восхотевшая. Радуйся, яко цвет чистоты, в неувядаемой славе цветущая; радуйся, яко крин, вонями твоих добродетелей нам благоухающая. Радуйся, в Небесном вертограде неизреченною радостью наслаждающаяся; радуйся, краснейшаго паче сынов человеческих зрением тамо утешающаяся. Радуйся, убелившая ризы твоя в крови Агнчей на земли; радуйся, в лике девственниц предстоящая Божиему Агнцу на небеси.

Радуйся, Параскево, невесто Христова всехвальная.

Кондак 2

Видевше благолепие лица твоего, святая мученице Параскево, людие удивляхуся, взирающе на тя, не уведяще красоты души твоея. Мы же, поминающе светлейшия паче солнца добродетели твоя, поим Господеви, даровавшему тебе благодать Свою: Аллилуия.

Икос 2

Мудрости вместилище паче ума мирских мудрецов явилася еси, отроковице непорочная, измлада уклонившись от любви к миру и отвергшись всего яже в мире, всею полнотою любви твоя возлюбила еси Небеснаго Жениха Христа, Царя Славы, Емуже, яко верная раба, в житии твоём апостольски послужила еси, живши свято среди неверных и безбоязненно проповедавши им Христа Бога. Таковому твоему разуму дивящеся, сия похвалы тебе воспоем:

Радуйся, премудрая Евангельская дево, во свете веры и дел благих ходившая; радуйся, Христа Господа, Божию Силу и Божию Премудрость паче всего возлюбившая. Радуйся, паче мудрецов мира сего мудрей мудрейшая; радуйся, паче старец идолослужительных разумевавшая. Радуйся, неверных светом веры просвещающая; радуйся, чад Церкви Христовы в вере утверждающая. Радуйся, любовь твою ко Христу ангельская ликостояния возвеселяющая; радуйся, демонския лукавствия оружием креста Господня отгоняющая. Радуйся, в проповедании веры богоглаголющая уста апостольская; радуйся, дев христианских украшение. Радуйся, верная ко Христу Богу молитвеннице о нашем спасении; радуйся, всех скорбящих крепкое заступление и ограждение.

Радуйся, Параскево, невесто Христова всехвальная.

Кондак 3

Силою Христовою соблюдаема, всеславная мученице Параскево, о болезнях телесных небрегла еси, подвигом добрым подвизатися хотящи. Мужеским смыслом вооружившись, слабость женскую отвергла еси, упованием же укрепившись, радостно предстала еси на судище, идеже ясно веру в Троицу Божественную проповедала еси, Богу вопиющи: Аллилуия.

Икос 3

Слышав от тебе, мудрая дочь, неправедный судия неслыханная словеса о твоём рождении, яко благочестивии родители твои, Страсти Христовы почитающе, знаменитаго дне тезоимениту тя нарекоша, Параскевою, в предзнаменование, яко Христовых страстей имаши быти причастницею. Не разуме же сего нечестивый игемон, но вещаше ти безстыдная словеса и повеле бити тя суровыми жилами и полумертву тя сущу ввергнуть в темницу. Ты же доблественне претерпевши жесточайшия муки, в темнице, аки в чертозе светле ликующи, вопияла еси: «Никогдаже отлучуся Тебе, Господи, но послми помощь Твою и спаси мя великия ради Твоя милости». Темже, ублажающе тя, вопием ти таковая:

Радуйся, незлобивая голубице, от искушений лукаваго врага

свободившаяся; радуйся, словесная агнице, от злаго волка мучителя к доброму пастырю Христу Богу прибегшая. Радуйся, во двор словесных овец, одесную Его стоящих, вшедшая; радуйся, на брак Агничий радостно текущая. Радуйся, яко тебе уготовано есть благ вечных сокровище; радуйся, яко тебе обетовано есть блаженство Царства Небеснаго. Радуйся, премудрая Евангельская дево, светло горящий светильник имущая; радуйся, дерзновение велие ко Христу Богу стяжавшая. Радуйся, волею своею благое иго Христово на ся подъявшая; радуйся, сердце свое от всякий лести душевредныя чисто сохраняя. Радуйся, истинная Христовых Страстей причастнице; радуйся, во страданиях твоих благодатную помощь от Христа Господа получившая.

Радуйся, Параскево, невесто Христова всехвальная.

Кондак 4

Бурю тяжких искушений воздвигоша врази противу тебе, многострадальная Параскево; ты же от твоих кровей трудолюбно чашу страданий испила еси, желаючи по Христе, Женисе твоём, во след потещи, прехвальная мученице, и яко ластовица доброгласная, песнь воспевала еси Христу Богу: Аллилуия.

Икос 4

Имуще всегда пред очима своими Господа, за исповедание веры палицами немилостивно от мучителей биема, радовалася еси, приснопамятная мученице Параскево, вопиючи: «Ничто же мя разлучит от любве Твоея, Христе», и тако подвизающися во славу Божию, угодила еси Господу. Темже, поминающе честная твоя страдания, с умилением зовем ти:

Радуйся, агнице вседобляя, пастыреначальнику Христу принесшаяся, яко жертва благоуханная; радуйся, безсмертному Жениху Христу непорочное мучение твое, яко вено пречестное, представившая. Радуйся, отроковице чистая, истинное исповедание веры православная пред неверными явившая. Радуйся, праведная обличительнице, неправду нечестиваго судии яве открывшая. Радуйся, яко тобою посрамися лукавый враг, видящъ себе от юной девы побежденна; радуйся, яко радуются о тебе и силы Небесныя, видяще тя немощну и младу суцу, побеждающую лютых мучителей. Радуйся, голубице чистая и непорочная сердцем; радуйся, смиренная агнице, благоуспешно честней и блаженней Страсти Господней уподобльшаяся. Радуйся, яко принеслася еси Зиждителю твоему, яко кадило благовонное; радуйся, яко зрит на тя пресветлое Солнце правды, тридневно возсиявшее от гроба и укрепившее тя к подвигу страдальческому. Радуйся, яко за преславная твоя страдания

сподобилася еси внити в чертог Христа, Царя Небеснаго; радуйся, яко тамо вкупе со святыми наслаждаешься неизреченною радостью.

Радуйся, Параскево, невесто Христова всехвальная.

Кондак 5

Благочестною звездою прешла еси в мире, страсотерпице славная Параскево, яко веру во Христа всем проповедаючи. Страдания многа и люта мужески претерпевши, мучителя посрамила еси и ко Христу Господу, яко свету незаходимому, радостно востекла еси. Емуже предстоящи с лики праведных, выну вопиеш: Аллилуия.

Икос 5

Видяще силы небесныя плотию страждущую Параскеву, Его силою крепящуюся, глаголаху: «Се, и девы на земли прославиша Господа!» Человецы же, трепетом одержими, ужасхуся, и удивляющесея, песнями прославляху: «О чудесе! Дева врага победи и молится милостивому Владыке за спасение мира». Сего ради и мы, поминающе исполненное веры мужество твое, преславная мученице, ублажаем тя, глаголюще:

Радуйся, доблественная страсотерпице, в защиту веры православныя подвизавшаяся; радуйся, наветов вражиих мудрая разорительнице. Радуйся, иконийскаго града учительнице; радуйся, идольския суетныя лести обличительнице. Радуйся, верных смыслы вонями добродетелей твоих благовонствующая; радуйся, смрад страстный благодатию, свыше ти данною, отгоняющая. Радуйся, еллинския кумиры, яко прах, уничижившая; радуйся, твоими подвиги, иже к Богу, тьмы начальника низложившая. Радуйся, горняя, паче дольних, вхождения в сердце твоем положити возлюбившая; радуйся, Христу Господу, Человеколюбцу, всю себе предавшая. Радуйся, подобне первомученице Фекле, мног народ словом Божиим просветившая; радуйся, неверных к Божественней вере приведшая.

Радуйся, Параскево, невесто Христова всехвальная.

Кондак 6

Проповедницу чудес и славы Божия явила еси себе, доблестная мученице Параскево, после преславнаго исцеления в темнице, от Христа Господа тебе дарованнаго. Емуже возсылая благодарственная моления, радостно мы вопием: Аллилуия.

Икос 6

Возсияла еси, яко светозарная звезда, обагрившиися каплями кровными, и Божественною благодатию отгнала еси безбожия тьму, мученице Параскево, просветивши верныя, чтущия твоя доблественныя подвиги. Темже восхваляюще тя, усердно вопием ти:

Радуйся, богомудрая дево, Христовых Страстей общнице; радуйся, в темнице ти сущей, ангельскаго посещения сподобльшаяся. Радуйся, в отраду болезней твоих орудия Страстей Христовых созерцавшая; радуйся, честный крест и терновый венец нетленнаго Жениха твоего, Христа, узревшая. Радуйся, язвы Господа на теле твоем носившая; радуйся, от всех язв Тем же Господем чрез Ангела исцеленная. Радуйся, яко Той же Господь даровал тебе крепость и премудрость, ейже не возмогоша противитися вси противляющиися истине; радуйся, от кровей твоих светлую себе ризу исткавшая. Радуйся, яко тобою от многих ран грешнии исцеляются; радуйся, яко тобою от различных болезней с верою тя призывающи здравие приемлют. Радуйся, уз греховных скорая решительнице; радуйся, о всех христианах пред Престолом Божиим верная молитвеннице.

Радуйся, Параскево, невесто Христова всехвальная.

Кондак 7

Хотящу безумному мучителю игемону желание свое улучшить и паки покушающуся ласкательными словесы тебе, святая мученице Параскево, от истиннаго Бога обрати к поклонению идолом; ты же, яко богомудрая дева, вразумляющи его в суетстве идолов, рекла еси ему: «Покажи ми, игемоне, богов, ихже ты мниши исцеливших мя от ран», и по велению мучителя пришедши в храм идольский, помолилася еси единому истинному Богу, от Егоже Святаго имене вси идоли падоша и разсыпашася в прах, во уверение, яко един есть Бог, прославляемый во Святей Троице, Емуже вкупе со святыми Ангелами выну вопиеш: Аллилуия.

Икос 7

Новую показа безчеловечия ярость зверообразный мучитель, егда тебе, святая мученице Параскево, повеле на древе повесити и свещами горящими опаляти твоя девическая ребра. Сие пачеестественное терпение твое благоговейно воспоминающе, похвалами блажим тя сицевыми:

Радуйся, многообразныя болезни за Царя Христа Бога претерпевшая; радуйся, яко пред лицом человеческим аще и муку прияла еси, упование же твое безсмертия исполнено есть. Радуйся, яко повешена была еси на древе Христа ради, на Кресте распятаго, да венцем нетления от Него увязешия; радуйся, яко строгана была еси по ребром, Иисуса ради копием в ребро прободеннаго, да Царствием Его Небесным насладишия. Радуйся, яко огонь любве к Богу в сердце твоем возжгла еси; радуйся, яко за Того свещами огненными палима была еси. Радуйся, твердейшая адаманта в терпении твоем показавшаяся; радуйся, в вере во Христа Господа крепчае паче

камене, в мужестве непоколебимом пребывшая. Радуйся, яко огнем опаляема, огненною мудростию пламень угасила еси естественный; радуйся, яко свещу неугасиму душевную соблювши, вошла еси со Христом Женихом твоим в чертог Небесный. Радуйся яко, чудесными искрами страсти умертвивши, демонския полки страдальчески победила еси; радуйся, яко страданиями твоими мног народ к познанию истиннаго Бога привела еси.

Радуйся, Параскево, невесто Христова всехвальная.

Кондак 8

Странное и страшное святых мученицы Параскевы страдание видяще, вернии удивляхуся зело: како млада отроковица сущи, в юности телеси таковыя мужественно за Христа терпит муки, слезнаго исполнишася умиления; невернии же трепетом одержими и чудесными искрами опаляеми от Ангела, бежаху; мы же, прославляюще дивнаго во святых Бога, вопием: Аллилуия.

Икос 8

Весь Сладчайший Иисус сладость, весь желание тебе бысть, святая мученице Параскево; сладце бо Его ради горькия терпела еси муки, глаголющи к мучителю: «Враже нечестивый игемоне, что неистовствуеши на христианы; ни царства у тебе отъях, ни града твоего разорих, но буими словесы увещати мя помышляеши. Аз плоти моя не щажду за Христа моего, зане Он любит мя: к Нему пойду и Того буду невеста. Той мене спасет о рук враг моих и дарует ми жизнь вечную». Поминающе сицевая твоя словеса и доблественныя подвиги твоего исповедничества, вопием ти:

Радуйся, злобы неверных не утрашившаяся; радуйся, твари паче Создавшаго не послужившая. Радуйся, во еже сопротивлятися врагом Божиим, в духовное всеоружие благодати Божией облекшаяся; радуйся, идолом немым и глухим в капище идольском не поклонившаяся. Радуйся, именем всесильнаго Господа и твоею к Нему молитвою вся идолы тамо сокрушившая; радуйся, демонов коварствия Божественною силою упразднившая. Радуйся, томления мучителей крестом Господним, яко державным оружием, мужески победившая; радуйся, огненное опаление и жжение девственного телесе твоего в воню мира Христу Богу принесшая. Радуйся, веру, надежду и любовь к Богу сохраняющая; радуйся, победы венец от руки Христа Жизнодавца приемшая. Радуйся, реко, исполненная благодати Божия водами; радуйся, источнице кипящий чудес излиянии.

Радуйся, Параскево, невесто Христова всехвальная.

Кондак 9

Всеми богокрасными лепотами добродетелей украсивши себе,

прехвальная мученице Параскево, явилася еси тверда и непоколебима во исповедании веры Христовы. Сего ради ангельское естество велиею возрадовася радостью, узревше мужественную крепость твою и твердое твое упование. И мы слышавше, како посрамися лукавый враг, от девы побеждаем, и како сам Христос Бог достойно венчает тя мученицу, купно с тобою радостно вопием прославляющему тя Господу: Аллилуия.

Икос 9

Витийствующий язык не возможет восхвалити дела твоя и великия страдальческия твоя подвиги по достоянию, славная мученице Параскево: кто бо повесть страдания твоя и добродетели; на судищи бо исповедавши истиннаго Бога, от безчеловечных мучителей претерпела еси лютая, болезненная страдания; и в сих жестоких болезнях бывши палицами биема, железными ногтями строгаема и огнем палима, ничтоже ино вешала еси к Создателю твоему, токмо сие: «Спаси мя, Господи, недостойную рабу, не разлучи мене, Христе, от Твоего желания!» Смиренно поминающе сие твоя страдания, умиленную песнь приносим ти, глаголюще:

Радуйся, кровию страдания твоего Христу Богу уневестившаяся; радуйся, Страстем Христовым подражавшая. Радуйся, любви ради Господни жестокия мучения претерпевшая; радуйся, от Небеснаго Царя благолепный венец восприявшая. Радуйся, яко всем верным воспоминание твое пресладко; радуйся, яко всей Церкви Христовой имя твое пречестно. Радуйся, досточудное Ангелом и человеком зрелище бывшая; радуйся, и самых мучителей непобедимым терпением твоим удивившая. Радуйся, яко Сам Господь свыше призре на твоя страдания; радуйся, яко Сам Той Подвигположник похвали твоя подвиги. Радуйся, девам доброто и похваление; радуйся, мучеником красото и верным утешение.

Радуйся, Параскево, невесто Христова всехвальная.

Кондак 10

Спаси хотя душу твою, о теле твоём всячески небрегла еси, святая мученице Параскево; егда бо на тя и мечное на смерть осуждение изыде от беззаконнаго мучителя, ты под меч острый, аки под венец красный, радостно потекла еси; и во главу усековена бывши, душею твоею воспарила еси в чертог Жениха твоего бессмертнаго, Христа Бога, Емуже выну на небесех ныне воспеваеши: Аллилуия.

Икос 10

Стена была еси крепка и непоколебима во исповедании веры в Триединаго Бога; сего ради многоболезненная страдания от мучителя

претерпела еси, и добре скончавши течение твое, венец от Христа Бога прияла еси, и ангельских ликостояний на небеси сподобилася еси. Темже поминающе твоя подвиги, ублажаем тя, многострадальная:

Радуйся, течение мученического пути добре скончавшая; радуйся, веру безсмертному Жениху Христу до смерти сохраняя. Радуйся, в житии твоем богоугодными делы Господеви послужившая; радуйся, за любовь ко Христу Богу всю мирскую суету отвергшая. Радуйся, силою свыше на брань противу сил преисподних препоясанная; радуйся, победоносною славою в вышних от Христа победителя одеянная. Радуйся, оружием благоволения Божия венчанная на земли; радуйся, цветом неувядаемым украшенная на небеси. Радуйся, христианом крепкое прибежище; радуйся, верным твердое заступление. Радуйся, беспомощных защитительнице: Радуйся, сирых покровительнице.

Радуйся, Параскево, невесто Христова всехвальная.

Кондак 11

Пение наше всякое побеждается, и многое множество хвалебных песней, восписуемых ти, несть довольно по достоянию восхвалити тя, прехвальная мученице Параскево: обаче молитвами твоими получающе от Христа Бога неисчетная благодеяния, благодарни суще, поем о тебе Ему: Аллилуия.

Икос 11

Возсиявши нам, яко светило светозарное, мрак демонский от человек твоими мольбами отгоняеши, святая мученице Параскево, приемши бо благодать целити недуги, всем верным, притекающим к тебе с молитвою, подаеши исцеление: кровоточивии бо и прокаженнии прикосновением к раце мощей твоих очищаются, глушии слышат, расслабленнии здрави бывают призыванием святого твоего имени. Мы же, поминающе скорое заступление твое, вопием ти:

Радуйся, благовонная смирно, Церковь Христову благоухающая; радуйся, благонадежная молитвеннице, фимиам молитвы о нас к Богу приносящая. Радуйся, мироположнице исцелений неоскудная; радуйся, сокровище Божиих даров неизживаемое. Радуйся, чаше, от обилия дому Божия черплющая радость; радуйся, сосуде, от исполнения Христова приемлющий всех благ небесных сладость. Радуйся, благодатную росу исцелений всем верным источающая; радуйся, скорбная сердца недужных дарованием исцелений ободряющая. Радуйся, яко Христос Бог за доблественная твоя страдания славу и велелепие на тя возложил есть; радуйся, яко тебе Царь царствующих и Господь господствующих блаженство Царствия Своего даровал есть. Радуйся, Царствия Христова сонаследнице;

радуйся, славы Божией сопричастнице.

Радуйся, Параскево, невесто Христова всехвальная.

Кондак 12

Благодать от Бога дана ти есть подавати исцеления всем требующим, яко от источника пребогатаго, хранити же и соблюдати от различных болезней, бед и скорбей всякаго человека, верою, любовью и благоговением честная твоя страдания воспоминающаго и почитающаго. Молитвеннаго твоего о нас предстательства и благодатных дарований не лиши и нас, многострадальная Христова стратотерпице; да и мы, здрави суще телом и духом, в нынешней и будущей жизни о тебе поем Богу: Аллилуия.

Икос 12

Поем твоя крепкия подвиги, почитаем страдания, хвалим долготерпение, ублажаем святую твою кончину, славим твое в немощном теле непобедимое мужество, имже на земли и на небеси прославилася еси, святая и добропобедная мученице Параскево; и в честь твоих победоносных подвигов и страданий похвальная восписуем ти сия:

Радуйся, от ангельских чинов в сожительство их любезно приятая; радуйся, от девственных ликов в чертог Небесный радостно введенная. Радуйся, от мученических полков под венец славы провождаемая во гласе радования; радуйся, от небесных жителей приемлющая о Господе целование. Радуйся, яко мзда твоя многа есть на небесех; радуйся, яко радость твоя вечна есть во светлости святых. Радуйся, в небесном чертозе Божественнаго Жениха твоего со Ангелы Его веселящаяся; радуйся, лицезрением всеблагаго Господа тамо вкупе со святыми наслаждающаяся. Радуйся, душевных и телесных недугов наших целительнице; радуйся, душеспасительных благ и небесных даров подательнице. Радуйся, яко тобою от нечаянныя смерти сохранитися уповаем; радуйся, яко твоим заступлением вечную жизнь от Христа Бога улучити благонадежно чаем.

Радуйся, Параскево, невесто Христова всехвальная.

Кондак 13

О святая, премудрая и всехвальная мученице, невесто Христова Параскево! От благоговейных сердец приносимую ти, аще и недостойную, хвалебную песнь сию приими от нас, яко усердную жертву сердец, любящих тя и чествующих святую память твою. Охраняй нас молитвами твоими святыми, и вся люди, притекающие к честней иконе твоей и с любовью лобызающия ю, избавляй от всякаго злаго обстояния и скорби; да тихое и безмолвное житие, поживше в

нынешнем веце, блаженство вечное наследим и купно с тобою и всеми святыми выну сподобимся воспевати Богу: Аллилуия.

(Этот кондак читается трижды, затем икос 1 и кондак 1)

Молитва

О святая невесто Христова, многострадальная мученице Параскево! Вемы, яко от юности твоя ты всею душею твоею и всем сердцем твоим возлюбила еси Царя славы, Христа Спасителя и Ему единому уневестилася еси, раздавши имения твоя неимущим и бедным. Ты, силою благочестия твоего, твоим целомудрием и праведностию, яко лучами солнечными, просияла еси, живши свято среди неверных и безбоязненно проповедавши им Христа Бога. Ты, от дней юности твоя, наученная твоими родителями, всегда благоговейно чествовала дни искупительных Страстей Господа нашего Иисуса Христа, Егоже ради и сама добровольно пострадала еси. Ты, десницею Ангела Божия от неисцельных ран дивно исцеленная и восприявшая неизреченную светлость, изумила еси неверных мучителей. Ты, именем Господа нашего Иисуса Христа и силою молитвы твоею в капище языческом всех идолов долу повергши, в прах сокрушила еси я. Ты, опаляемая свечами, единою молитвою твоею ко всесильному Господу угасила еси огонь естественный, и тем же пламенем, чудесно возжженным чрез Ангела Божия, поपालивши неистовых беззаконников, мног народ привела еси к познанию истиннаго Бога. Ты, во славу Господа приявши мечное главы твоя усечение от мучителей, доблественно скончала еси страдальческий твой подвиг, возшедши душею твоею на небеса, в чертог вожделеннаго твоего Жениха Христа Царя Славы, радостно сретшаго тя сим небесным гласом: «Радуйтесь, праведнии, яко мученица Параскева увенчана!» Темже и мы днесь приветствуем тя, многострадальная, и, взирающе на святую твою икону, с умилением вопием ти: всечестная Параскево! Вемы, яко велие имаши дерзновение ко Господу; умоли убо Его Человеколюбца и о нас с предстоящих и молящихся ти. Да подаст Он и нам, якоже тебе, терпение и благодушие в бедах и скорбных обстояниях; да дарует Он, ходатайством твоим и заступлением, радостное, благоденственное и мирное житие, здравие же и спасение, и во всем благое поспешение возлюбленному нашему Отечеству, да ниспослет святое Свое благословение и мир, и всем православным христианам да подаст твоими святыми молитвами утверждение в вере, благочестии и святости, преспеяние же в христианской любви и всякой добродетели; да очистит нас грешных от всякия скверны и порока; да оградит нас

святыми Своими Ангелами, да заступит, сохранит и помилует всех святою Своею благодатию и соделает наследниками и причастниками Небеснаго Своего Царствия. И тако улучивше спасения твоими святыми молитвами, предстательством и заступлением, всеславная невесто Христова Параскево, прославим все пречестное и великолепое имя дивнаго во святых Своих истиннаго Бога, Отца и Сына и Святаго Духа всегда, ныне и присно, и во веки веков. Аминь.